



24.april 2019

UPA2019/59

Meeqqat atuarfiani digitalimut piorsaanerup taamatullu digitalimik atuinerup immikkut ilinniartitsissutigineqartalernissaat anguniarlugu inatsisissamut siunnersuummik saqqummiuseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Suliamut tassunga atatillugu Naalackersuisut attavigissavaat Institut for Læring aamma kommunit siunertaralugu UV-mut atortunik naapertuuttunik ineriartortitsinissaq aamma ilinniartitsisutut ilinniagaqareersut ilinniaqqissinnaanissaat.

(Inatsisartunut ilaasortaq Aleqa Hammond, Nunatta Qitornai)

Ilinniartitaaneq siunissaraarput. Inuiaat imminut pilersortut napatittullu tassaapput ilinniagaqassutsikkut aamma imminut napatittut. Ilinniakkatigut ineriartorneq sukkaqaaq, periarfissat amerliartorput, inerisaaneq annertuvoq aammalu ilinniarumassuseqarnermut suliniutit annertusarlugit suliarneq tassaavoq aqqut pingaaruteqarluinnartoq.

Ilinniarsimassutsikkut aatsaat taama qaffasitsigisumik inissisimavugut. Ukiut tamaasa qaffasissumik ilinniagaqartut, allagartartaarfiusumik angusaqarfiusut, assassornermik tunngaveqartumik ilinniagaqartut, peqqissaasunngortut allarpassuillu inuiaqatigiinni pisariaqartitavut naammassisartut amerlatigaat. Inuiattut imminut tuitsigut pattalaartarnissarput tulluusimaartarnissarpullu pisariaqarpoq taama ulloq manna tikillugu angusarissaartigisunik nunaqqateqaratta piumassusilissuarnik.

Taamaattoq aamma angusat nalilersorneqartuaannassapput oqarlut suli angusarissaarnerusinnaavugut aammalu pitsanngorsagassaqarnerusinnaavugut.

Ullumikkut silarsuarput digitaliusumik ingerlavoq aammalu annersigaluttuinnassasoq nalunngilarput. Suliffeqarfiit, ingerlatsiviit aammalu ilinniarfiit digitaliusumik ingerlatsiffiusut tassapput siunissamut eqqanaartut piareersimasullu.

Digitaliusumik attaveqarneq, ingerlatsineq ilinniartitsinerlu annertusarumallugit suliniarnermi siunnersuuteqarneq assut ilassilluarnarpoq nuannaarutigarpullu siunnersuummut Naalackersuisut naaperiuteqarlutik allannguutissamik siunnersuuteqarnerinut, tamannalu tunngavigalugu siunnersuut ataatsimiititaliamut ingerlateqqipparput.